



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu Kazu
Tribunál Distritál Baucau
Edisaun Dezembru 2017

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 27

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	14
Artigu 145(KP)	Ofensa ba integridade fízika simples	4
Artigu 154 (KP)	Maus tratus ba kónjuje	2
Artigu 258 (KP)	Danu simples	1
Artigu 172 no 173 (KP)	Violasaun seksuál	1
Artigu 157 KP	Ameasa	1
Artigu 243 (KP)	Obstrusaun ba autoridade Públiku	1

Artigu 177 (KP)	Abuzu seksuál ba menór	2
Artigu 140 (KP)	Omisídiu negligente	1
Totál		27

2. Totál desizaun ne'ebé JSMP monitoriza: 27

Tipu desizaun	Númeru
Pena prizaun (artigu 66 KP)	2
Suspensaun ba prizaun nia ezekusaun (artigu 68 KP)	11
Pena multa (artigu 67 KP)	7
Omologa dezisténsia keixa	5
Absolve	2
Totál	27

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0029/15.BCBCV
 Komposisauns Tribunal : Singulár
 Juis : Dr. José Goncalves
 Prokuradór : Dr. Luis Hernani Rangel Da Cruz
 Defeza : Dr. Grigorio de Lima
 Tipu pena : Pena prizaun fulan 2 suspende ba tinan 1

Iha 1 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FGB hasoru nia feen, iha Distritu Baucau.

Akuzasaun Prokuradór

Prokuradór akuza katak iha 28 Maiu 2015, iha tuku 10.10 dadeer, arguidu lori fatuk tuda dala 1 iha lezada nia kanuruk. Aktu ne'e rezulta lezada nia kanuruk ran, no lezada monu ba rai no

dezmaia. Wainhira lezada hetan fali nia conseinsia, lezada ba iha nia bin nia uma no telefone polisia no kontinua ba halo tratamentu iha Ospital Baucau.

Prokurador akuza arguidu kontra artigu 145 Kodigu Penal kona-ba ofensa ba integridade fizika simples ho moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu konfesa faktus hotu iha akuzasaun, arguidu mos deklarata katak foin primeira- vez mai hatan iha Tribunal, arrepende ona nia hahalok no di'ak malu ona ho lezada.

Alegasaun final

Prokurador konsidera arguidu provadu komete krime hasoru lezada, tanba ne'e husu ba Tribunal atu kondena arguidu ho pena prizaun fulan 2 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunal. Tanba ne'e husu ba Tribunal aplika pena ne'ebé adekuadu ba arguidu.

Desizaun

Depoizide avalia faktus provadu hotu ne'ebé prodús durante julgamentu, Tribunal konklui prosesu ne'e no kondena arguidu ho pena prizaun fulan 2 supende ba tinan 1.

2. Krime maus tratus ba konjuje

Nú. Prosesu	: 0030/16. BCSIC
Kompozisaun Tribunal	: Kolektivu
Juis	: Dra. Ercilia de Jesus Dr. Afonso Carmona Dr. Jose Goncalves
Prokurador	: Dr. Domingos G. Barreto
Defeza	: Dr. Sidonio M. Sarmiento
Tipu pena	: Pena multa

Iha 4 Dezembru 2017, Tribunal Distrital Baucau prezide julgamentu leitura akordaun ba krime maus tratus ba konjuje ne'ebé envolve arguidu NdCR hasoru nia feen, iha Distritu Viqueque.

Akuzasaun Prokurador

Prokurador akuza katak iha 12 Outubru 2016, iha tuku 22.00 kalan, arguidu lori lampra tuda lezada no kona iha lezada nia kotuk laran. Arguidu mos tuku dala barak iha lezada nia kotuk laran no tuku dala 2 iha lezada nia tilun parte karuk no tuku dala 1 iha lezada nia ulun.

Prokurador akuza arguidu kontra artigu 154 Kodigu Penal kona-ba krime maus tratus ba konjuje ho nia moldura penal tinan 2 too tinan 6 no konjuga ho artigu 2, 3, 35 no artigu 36 LKVD.

Produsaun ba prova

Arguidu konfesa faktus hotu iha akuzasaun no deklarata katak depoisde akontesementu ne'e arguidu buka tuir kedas lezada nia familia hodi tu'ur hamutuk rezolve kazu ne'e. Arguidu husu ona deskulpa ba lezada no fo indemnizasaun ba lezada ho osan US\$1000,00, karau 1 no tais feto 1 no sira kontinua moris hamutuk fali. Arguidu mos deklarata katak arrepende ona nia hahalok no foin primeira-vez mai hatan iha Tribunál. Iha parte seluk lezada kontinua reforsa faktus sira iha akuzasaun. Lezada mos konfirma katak sira konsege rezolve ona problema ne'e no arguidu fo ona indemnizasaun ba lezada.

Alegasaun final

Prokurador konsidera arguidu provadu komete krime hasoru lezada no husu ba Tribunál aplika pena prizaun tinan 2 suspende ba tinan 2.

Enkuantu Defeza haktuir katak arguidu konfesa faktus hotu iha akuzasaun, di'ak malu ona ho lezada, arrepende ona nia hahalok no foin primeira-vez mai hatan iha Tribunál. Aleinde ne'e arguidu fo ona indemnizasaun ba lezada. Tanba ne'e husu ba Tribunál aplika pena ne'ebé kmaan ba arguidu.

Desizaun

Depoisde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena multa US\$90.00 ne'ebé sei selu US\$1.00 kada loraun durante loraun 90 no selu kustu judisial US\$20.00. Tribunal mos fiksa pena alternativa durante loraun 90 prizaun, wainhira arguidu la kumpri pena multa ne'e.

3. Krime maus tratus ba konjuje

Nú. Prosesu	: 0041/17.PDBAU
Kompozisaun Tribunál	: Koletivu
Juis	: Dra. Ercilia de Jesus Dr. Afonso Carmona Dr. Jose Goncalves
Prokurador	: Dr. Domingos G. Barreto
Defeza	: Dr. Grigorio de Lima
Tipu pena	: Pena prizaun tinan 2 suspende ba tinan 3

Iha 4 Dezembru 2017, Tribunál Distritál Baucau prezide julgamentu leitura akordaun ba krime maus tratus ba konjuje ne'ebé envolve arguidu PS hasoru nia feen, iha Distritu Viqueque.

Akuzasaun Prokurador

Prokurador akuza katak, iha 8 Janeiro 2017, iha tuku 15.30 lokraik, arguidu basa dala 1 iha lezada nia hirus matan, tuku dala 4 iha lezada nia kotuk laran no foti katana no duni lezada atu taa, maibe la konsege tanba intervensaun hosi lezada nia familia.

Antes ne'e, iha 1 Janeiro 2017, iha tuku 15.30 lokraik, arguidu basa dala barak iha lezada nia hasan parte loos no karuk no tuku dala 2 iha lezada nia knosen.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 too tinan 6 no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu deklarata katak iha faktus balu loos no faktus balun la loos. Faktus ne'ebé loos mak akontese iha 8 Janeiru 2017. Enkuantu kona-ba faktus ne'ebé akontese iha 1 Janeiru 2017 ne'e laloos. Arguidu mós deklarata katak di'ak malu ona ho lezada, arrepende ona nia hahalok no foin primeira-vez mai hatan iha Tribunál. Iha parte seluk lezada kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada, mezmua arguidu nega faktus balun iha akuzasaun, maibé lezada kontinua konfirma no reforsa faktus sira iha akuzasaun. Tanba ne'e husu ba Tribunál atu kondena arguidu ho pena prizaun tinan 2 suspende ba tinan 2.

Enkuantu Defeza haktuir katak arguidu deklarata de'it faktus ne'ebé nia komete, di'ak malu ona ho lezada, foin primeira-vez mai hatan iha Tribunál no arrepende ona nia hahalok. Tanba ne'e husu ba Tribunál aplika pena ne'ebé kmaan ba arguidu.

Desizaun

Depoizide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 3 no selu kustu judisiál US\$ 20.00.

4. Krime danu simples

Nú. Prosesu	: 0024/15. MNNTB
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dra. Ivonia M. Guterres
Defeza	: Dr. Jose M. Guterres
Tipu pena	: Omologa dezisténsia keixa

Iha 4 Dezembru 2017, Tribunál Distritál Baucau prezide julgamentu tentativa konsiliaun ba krime danu simples ne'ebé envolve arguidu JE hasoru lezada MS nu'udar kordenadora Eskola EB Filial Aiteas, iha Suku Aiteas, Sub-distritu Manatuto, Distritu Manatuto.

Akuzasaun Prokuradór

Prokuradór akuza katak maisumenus iha tinan 2012, arguidu lori kareta halai tama ba kampo basket eskola nian no estraga sasan ne'ebé uluk arguidu mak solda. Kazu ne'e akontese tanba komisaun organizadora torneu kopa Manatuto promete atu selu arguidu nia kolen ba solda basket nia rin ho osan US\$30.00, maibé administrasaun la simu arguidu nia pedidu, tanba ne'e arguidu komete aktu ne'e.

Prokuradór akuza arguidu kontra artigu 258 Kódigu Penál kona-ba krime danu simples ho moldura penal tinan 3 prizaun ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliausaun, nune'e antes tama ba julgamentu produsaun ba provas, juis husu atu halo tentativa konsiliausaun ba arguidu no lezada.

Iha prosesu konsiliausaun ne'e, arguidu husu deskulpa ba lezada ho maluk sira hotu, tanba depoisde akontesementu ne'e parte administrasaun selu ona arguidu nia kolen ho osan US\$100.00. Arguidu mós deklara katak arrepende ona nia hahalok no promete sei la komete tan krime hanesan. Lezada konkorda ho pedidu ne'e no husu ba Tribunál atu dezisté ninia-keixa hasoru arguidu.

Alegasaun final

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu dame hosi parte sira, Tribunál konklui prosesu ne'e no omologa akordu dame entre parte sira.

5. Krime ofensa ba integridade física simples ho natureza violência doméstica

Nú. Prosesu	: 0036/14.LASIC
Komposizaun Tribunál	: Singulár
Juis	: Dr. Antonio Fonseca
Prokuradór	: Dra. Ivonia M. Guterres
Defesa	: Dr. Jose M. Guterres
Tipu pena	: Pena prizaun fulan 4 suspende ba tinan 1

Iha 5 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade física simples ho natuteza violência doméstica ne'ebé envolve arguidu AF hasoru nia feen, iha Distritu Lautem.

Akuzasaun Prokuradór

Prokuradór akuza katak iha 19 Marsu 2004, iha tuku 15.00 lokraik, arguidu basa dala 1 iha lezada nia ibun no kaer lezada nia liman dada ba mai no rezulta lezada monu ba rai.

Prokuradór akuza arguidu kontra artigu 145 Kódigu Penál kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3 no 35 LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklara katak arrepende ona ninia hahalok, foin primeira-ves mai hatan iha Tribunál no di'ak malu ona ho lezada. Aliende ne'e lezada kontinua reforsa faktus sira iha akuzasaun.

Alegasaun final

Prokurador konsidera arguidu provadu komete krime hasoru lezada bazeia ba konfisaun arguidu nian, tanba ne'e husu ba Tribunál atu kondena arguidu ho pena prizaun fulan 6 suspende ba tinan 1 fulan 6.

Enkuantu Defeza husu ba Tribunál aplika pena ne'ebé adekuadu ba arguidu, tanba arguidu konfesa, arrepende ona nia hahalok no foin primeira-ves mai hatan iha Tribunál.

Desizaun

Depoide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun fulan 4 suspende ba tinan 1.

6. Krime ofensa ba integridade física simples ho natureza violência doméstica

Nú. Prosesu	: 0009/17.MNLCL
Komposisaun Tribunál	: Singulár
Juis	: Dr. José Quintão
Prokurador	: Dra. Ivonia M. Guterres
Defeza	: Dr. Sidonio M. Guterres
Tipu pena	: Pena multa

Iha 5 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu VNFT hasoru nia feen, iha Distritu Manatuto.

Akuzasaun Prokurador

Prokurador akuza katak iha 20 Maiu 2017, iha tuku 10.00 dadeer, arguidu tuku dala 2 iha lezada nia ulun no lezada konsege ba halo tratamentu iha Centru Saúde Behau, Manatuto.

Prokurador akuza arguidu kontra artigu 145 Kódigu Penál kona-ba ofensa ba integridade física simples ho moldura penal too tinan 3 ka multa konjuga ho artigu 2, 3 no 35 LKVD.

Produsaun ba prova

Iha julgamentu arguidu konfesa faktus hotu iha akuzasaun, aguidu mós deklara katak arrepende ona ninia hahalok, di'ak malu ona ho lezada no promote katak sei la repete tan ninia hahalok ne'e iha futuru. Iha parte seluk lezada kontinua reforsa faktus sira iha akuzasaun.

Alegasaun final

Prokurador konsidera arguidu provadu komete krime hasoru lezada. Tanba ne'e atu halo prevensaun iha futuru, husu ba Tribunál atu kondena arguidu ho pena multa.

Enkuantu Defeza husu ba Tribunál atu aplika pena ne'ebé la limita arguidu nia liberdade, tanba arguidu konfesa, arrepende ona nia hahalok no kolabora di'ak ho Tribunál.

Desizaun

Tribunál konklui prosesu ne'e no kondena arguidu ho pena multa US\$15.00 no sei selu 0.50 sentavus kada lora durante lora 30. Tribunál mós fiksa pena alternativa durante lora 20 prizaun, wainhira arguidu la kumpri pena multa ne'e.

7. Krime ofensa ba integridade fízika simples ho natureza violénsia doméstika

Nú. Prosesu : 0006/17.VQOSU
Komposizaun Tribunál : Singulár
Juis : Dra. Ercilia de Jesus
Prokuradór : Dr. Domingos Goveia Barreto
Defeza : Dr. Grigorio de Lima
Tipu pena : Pena prizaun fulan 1 suspende ba tinan 1

Iha 4 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdCX hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 19 Marsu 2017, iha tuku 08.00 dadeer, arguidu tebe dala 1 iha lezada nia kelen parte loos.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal too tinan 3 ka multa konjuga ho artigu 2, 3 no 35 letra (b) LKVD.

Produsaun ba prova

Iha julgamentu arguidu deklara katak iha akontesementu ne'e arguidu la tebe lezada no sira diskute malu de'it. Iha parte seluk lezada kontinua reforsa faktus sira iha akuzasaun. Aleinde ne'e lezada mós deklara tan katak depoisde akontesementu ne'e lezada ba hela ho lezada nia inan aman no seidauk di'ak malu ho arguidu, tanba arguidu hola ona feto seluk.

Alegasaun final

Prokuradór konsidera arguidu provadu komete krime hasoru lezada, tanba ne'e atu halo prevensaun iha futuru husu ba Tribunál atu kondena arguidu ho pena multa.

Enkuantu Defeza husu ba Tribunál atu absolve arguidu hosi prosesu ne'e, tanba arguidu deklara katak iha akontesementu ne'e arguidu la tebe lezada, maibé sira diskute malu de'it.

Desizaun

Tribunál prova katak arguidu komete duni krime hasoru lezada tuir faktus husi akuzasaun. Bazeia ba faktus provadus hirak-ne'e, Tribunál konklui prosesu ne'e no kondena arguidu ho pena prizaun fulan 1 suspende ba tinan 1.

8. Krime violasaun seksuál

Nú. Prosesu : 0014/15. MNNTB
Komposizaun Tribunál : Kolektivu

Juis : Dr. Jose Quintão
Dr. Antonio Fonseca
Dr. Hugo da Cruz Pui
Prokuradór : Dr. Luis H. Rangel da Cruz
Defeza : Dr. Jose Maria Guterres
Tipu pena : Absolve

Iha 12 Dezembru 2017 Tribunál Distrital Baucau prezide julgamentu leitura akordaun ba krime violasaun seksuál ne'ebé envolve arguidu HId hasoru lezada RM, iha Distritu Manatuto.

Akuzasaun Prokuradór

Prokuradór akuza katak iha 10 Setembru 2015, iha tuku 18.00 lokraik, lezada ba ku'u aifarina tahan iha to'os laran no arguidu bolu lezada dala rua maibé lezada lakohi. Derepente arguidu habesik ba lezada no kaer lezada riba ba rai. Arguidu hasai nia ropa no hafoin hasai lezada nia lipa no kabaya to'o nakles, no halo relasaun seksuál ho lezada no arguidu hamrik hatais fali nia kalsa no arguidu fila ba uma no husik hela lezada iha to'os laran.

Prokuradór akuza arguidu kontra artigu 172 Kódigu Penál kona-ba krime violasaun seksuál konjuga ho artigu 173 Kódigu Penál kona-ba agravasaun.

Produsaun ba prova

Iha julgamentu arguidu nega faktus hotu iha akuzasaun. Arguidu deklara katak iha akontesementu ne'e arguidu ho nia feen ba duni to'os, maibé fila fali kedas. Aleinde ne'e arguidu mós deklara katak antes ne'e arguidu ho lezada iha problema, tanba arguidu dun lezada ho nia familia sira mak na'ok arguidu nia fahi. Iha parte seluk lezada kontinua reforsa faktus sira iha akuzasaun.

Testemuña AdC nu'udar arguidu nia feen depoimenta katak iha akontesementu ne'e arguidu ho testemuña iha uma to'o tuku 16.00 lokraik mak ba to'os no fila fali ba uma iha tuku 18.00 lokraik. Hafoin iha tuku 20.00 (kalan) arguidu nia tia fó hatene katak arguidu halo violasaun seksuál ba lezada. Tanba ne'e testemuña ho arguidu ba kedas lezada nia uma no husu lezada kona-ba akontesementu ne'e, maibé lezada nonok de'it.

Testemuña BdR nu'udar vizuñu depoimenta katak iha akontesementu ne'e testemuña iha hela nia to'os maizumenus iha tuku 16.00 lokraik no hasoru arguidu ho nia feen sira konversa uitoan no aguidu ho nia feen kontinua ba sira nia to'os. Maizumenus iha tuku 17.20 lokraik, testemuña fila ba nia uma no testemuña la haree lezada iha fatin akontesementu ne'e.

Alegasaun final

Prokuradór haktuir katak, mezmu arguidu nega faktus hotu iha akuzasaun, maibé lezada konfirma no reforsa faktus sira iha akuzasaun. Prokuradór rejeita totál testemuña AdC no BdR nia deklarasaun tanba deklarasaun ne'e hanesan planeadu tiha. Tanba ne'e husu Tribunál atu kondena arguidu tuir krime ne'ebé arguidu komete.

Enkuantu Defeza bazeia deklarasaun arguidu nomós testemuña sira husu ba Tribunál atu absolve arguidu hosi prosesu ne'e, tanba arguidu la provadu komete krime hasoru lezada.

Desizaun

Depoizde avalia faktus provadu sira ne'ebé prodús durante julgamentu, Tribunál la hetan prova sufisiente atu hetan konviksaun katak arguidu komete krime violasaun seksuál hasoru lazada. Tanba ne'e Tribunál konklui prosesu ne'e no absolve arguidu hosi alegasaun prokuradór nian.

9. Krime obstrusaun ba autoridade públiku

Nú. Prosesu	: 0005/16. BCSIC
Kompozisaun Tribunál	: Kolektivu
Juis	: Dr. Jose Goncalves Dr. Hugo da Cruz Pui Dr. Jose Quintão
Prokuradór	: Dra. Ivonia M. Guterres
Defeza	: Dr. Sidonio M. Sarmiento
Tipu pena	: Absolve

Iha 15 Dezembru 2017 Tribunál Distritál Baucau prezide julgamentu leitura akordaun ba krime obstrusaun ba autoridade públiku ne'ebé envolve arguidu EMdC hasoru lezadu SF no DC (nu'udar membru PNTL), iha Distritu Baucau.

Akuzasaun Prokuradór

Prokuradór akuza katak iha 29 Janeiru 2016, iha tuku 19.00 kalan, arguidu ho nia kolega 1 ho motor ba iha estasaun polisia nia oin hodi gas motor ho lian maka'as iha portaun oin no tama ba edifisiu laran hodi hakilar no husu "*polisia se mak baku hau nia oan?*"

Bainhira arguidu husu nune'e, lezadu DC ko'alia ba arguidu hodi hakalma arguidu, maibé arguidu kontinua dudu malu ho lezadu DC no lezadu SF. Lezadu sira konsege dudu sai arguidu no arguidu tuku nia hirus matan no dehan katak "*ha'u ne'e veteranu, luta-na'in, atributu polisia nian ne'ebé imi uza ne'e ha'u-nian.*" Aleinde ne'e arguidu mós tolok lezadu sira, maibé lezadu sira la komete aktu ruma hasoru lezadu no ema mós hobur barak ona, tanba ne'e lezadu sira husu apoiu unidade polisia *task force* hodi tiru sae gas air mata no ema barak halai namkari. Kazu ne'e akontese wainhira labarik sira baku malu iha kampo joga bola nian, tanba ne'e lezadu nain rua bolu labarik sira ba estasaun polisia hodi halo identifikasaun.

Prokuradór akuza arguidu kontra artigu 243 Kódigu Penál kona-ba krime obstrusaun ba autoridade públiku ho pena tinan 2 – 6 prizaun ka sé kazu ne'e akontese duni bele hetan tinan 2 – 8 prizaun.

Produsaun ba prova

Arguidu deklara katak iha akontesementu ne'e arguidu fila hosi servisu iha dalan área Vila Antiga, hare polisia tula arguidu nia oan. Tanba ne'e arguidu ba estasaun polisia atu husu tuir. Wainhira arguidu to'o no foin para motor atu hakat ba edifisiu laran lezadu SF lori stik baku arguidu maibé la konsege kona. Enkuantu lezadu DC dudu arguidu sai ba liur. Arguidu mós deklara katak nia la gas motor ho lian maka'as no la dudu lezadu sira. Arguidu rejeita liafuan katak nia veteranu no nia laiha intensaun atu impede lezadu sira no testemuña sira nia servisu no

nia intensaun mak atu ba hare de'it nia oan. Arguidu mós deklarata katak foin primeira-vez mai hatan iha Tribunál.

Iha parte seluk lezadu sira kontinua konfirma no reforsa faktus sira iha akuzasaun. Lezadu sira mós deklarata katak depoisde halo tiha identifikasaun lezadu sira lori fali labarik ba entrega iha sira nia inan aman, tanba idade menór.

Testemuña DdC nu'udar membru polísia depoimenta katak iha akontesementu ne'e testemuña iha eskuadra laran no halo identifikasaun hela ba labarik nain 3 mak rona arguidu hakilar no tolok no dehan katak *"polísia ne'ebé mak baku hau nia oan"*.

Testemuña GdC (membru PNTL) depoimenta katak iha akontesementu ne'e testemuña iha eskuadra laran no halo mós identifikasaun ba labarik nain 3 mak rona arguidu hakilar kilat ne'ebé polísia kaer ne'e arguidu nian no arguidu nu'udar ema veteranu.

Testemuña JdPF (mamburu PNTL) depoimenta katak testemuña ho maluk sira lori tama ona labarik ba eskuadra laran no halo hela identifikasaun, derepente arguidu ho motor mai hakilar katak nia veteranus no kilat ne'ebé polísia sira tara ne'e arguidu nian no komesa dudu malu ho lezadu DC no SF. La kleur ema barak mai barullu nune'e testemuña mós sai ba estrada hodi hakalma situasan maibé ema barak liu, nune'e testemuña kontaktu fali ba unidade polísia task force.

Alegasaun finál

Prokuradór konsidera arguidu provadu komete krime obstrusaun ba autoridade públiku, bazeia ba faktu sira iha akuzasaun. Tanba ne'e husu ba Tribunál atu kondena arguidu ho pena multa.

Enkuantu Defeza haktuir katak bazeia ba deklarasaun arguidu nian katak nia la gas motor makaas, la tolok no la dudu malu ho lezadu sira no la halo impedementu ba identifikasaun ne'ebé halo hela hosi polísia. Tanba ne'e husu ba Tribunál absolve arguidu hosi prosesu.

Desizaun

Tribunál konklui katak Tribunál la hetan prova ruma ne'ebé bele estabelese Tribunál ninia konviksaun katak arguidu halo impedementu ba prosesu identifikasaun ne'ebé polísia halo durante prosesu identifikasaun ne'e. Bazeia ba konsiderasaun ne'e Tribunál absolve arguidu hosi akuzasaun Prokuradór nian.

10. Krime abuzu seksuál ba menór

Nú. Prosesu	: 0157/13. BCSIC
Kompozisaun tribunal	: Kolektivu
Juis	: Dr. Jose Goncalves Dr. Afonso Carmona Dra. Ercilia de Jesus
Prokuradór	: Dra. Ivonia Maria Guterres
Defeza	: Dr. Cristovao Nuno Ximenes

Tipu pena

: Pena prizaun tinan 22

Iha 12 Dezembru 2017, Tribunál Distrital Baucau prezide julgamentu leitura akordaun ba krime abuzu seksuál ba menór ne'ebe envolve arguidu CG hasoru nia oan fetu rasik ho idade tinan 13, iha Distritu Baucau.

Akuzasaun Prokuradór

Prokuradór akuza katak iha 26 Feveireiru 2013, iha tuku 21.00 kalan arguidu halo tauk lezada atu labele toba iha nia kuartu. Maibé lezada la preokupa ho saida mak arguidu hateten no lakleur fatuk ida tarutu kona iha uma leten ne'ebé taka ho akadiru tahan. Tanba ne'e halo lezada tauk no ba bolu nia alin kiik oan ba toba iha kama ne'ebé mamuk hamutuk ho arguidu iha kuartu ida.

Tuir loloos, lezada atu ba toba ho nia inan, maibé arguidu bandu tanba nia inan hetan moras tinan barak ona. Wainhira lezada toba la hatene tuir katak arguidu mós ba toba tuir lezada no arguidu hasai lensol hosi lezada no lezada hakilar, maibé arguidu taka metin lensol ba lezada nia ibun no amiasa lezada katak labele konta sai akontesementu ne'e selae arguidu sei oho tiha lezada. Depois arguidu hasai nia ropa ne'ebé nia hatais loke lezada nia kelen, lori liman rua satan netik nune'e halo lezada labele reziste, arguidu sae ba lezada nia leten halo relasaun seksuál to'o ezequila, depoisde ne'e arguidu toba iha lezada nia sorin maibé lezada tanis to'o rai naroman.

Iha tuku 08.00 dadeer, lezada hader fase bikan arguidu hakbesik ba nafatin dehan ho amiasa ba lezada katak "*se ó fó hatene ó-nia tiu polísia hau oho kedas ó*". Tanba ne'e lezada tauk la konta ba família. Wainhira arguidu fila hosi natar iha tempu kalan arguidu sempre obriga lezada hodi halo relasaun seksuál ho lezada no hahalok ne'e arguidu sempre repete hela de'it.

Iha 28 Marsu 2013, iha Kinta-feira santa lezada ba misa iha igreja lokal, iha tuku 21.00 kalan. Wainhira sai hosi misa lezada la koho ona ba uma tanba tauk arguidu repete tan hahalok ne'e hasoru lezada no lezada deside ba toba iha nia avo nia uma. Iha loro tuir-mai ha 29 Marsu 2013 tempu dader lezada konta akontesementu hirak ne'e ba nia prima HRF, avo FXR no nia tiu polísia no iha loron ne'e kedas sira ba hato'o keixa iha Estasaun Polísia Gari-Uai.

Prokuradór akuza arguidu kontra artigu 177 Kódigu Penál kona-ba krime abuzu seksuál ba menór konjuga ho artigu 182 Nu.1 (a) Kódigu Penál kona-ba agravasaun.

Produsaun ba prova

Iha julgamentu, arguidu nega faktus hotu iha akuzasaun, arguidu mós deklara katak iha fulan Janeiru to'o Abril 2013, arguidu halai natar no durante ne'e toba de'it iha natar laran no la fila ba uma. Iha parte seluk lezada kontinua mantein no konfirma faktus sira iha akuzasaun.

Testemuña ARF nu'udar lezada nia inan depoimenta katak testemuña la iha koñesementu kona-ba problema ne'e, derepente polísia bolu ba Estasaun Polísia Gari-Uai mak testemuña foin hatene kona-ba problema ne'e.

Testemuña HRF nu'udar lezada nia inan ki'ik depoimenta katak iha 25 Marsu 2013, kalan lezada ho nia alin nain 2 ba testemuña nia uma no lakoho fila ba sira nia uma no iha dadeer mak lezada konta ba testemuña katak arguidu sempre halo relasaun seksuál bebeik ho lezada.

Testemuña FXR nu'udar lezada nia avo fetu depoimenta katak iha akontesementu ne'e lezada ba toba iha testemuña no konta ba testemuña katak arguidu sempre halo relasaun seksuál ho lezada durante fulan 1.

Alegasaun final

Prokurador haktuir katak mezmu arguidu nega faktus hotu iha akuzasaun, maibe lezada nu'udar arguidu nia oan nafatin konfirma no reforsa faktus hotu iha akuzasaun. Tanba ne'e husu ba Tribunál atu kondena arguidu ho pena prizaun tinan 15 prizaun.

Enkuantu Defeza haktuir katak Tribunál presija konsidera mos arguidu ninia deklarasaun iha produsaun provas katak arguidu la komete krime ne'e. Tanba ne'e husu ba Tribunál atu tetu didiak tanba arguidu nu'udar lezada nia aman.

Desizaun

Tribunál konsidera katak arguidu provadu komete krime abuzu seksuál ba menor tuir artigu 177 alinea 1 Kódigu Penál ho alterasaun jurídiku ba artigu 182 alinea 1 letra (a) ne'ebé antes ne'e Prokurador akuza, ba fali artigu 182 alinea 1 letra (d) Kódigu Penál kona-ba vítima ajente nu'udar nia dexendente, konjuga ho artigu 35 LKVD. Tribunál halo kumulasaun jurídiku krime sira ne'ebé akontese ne'e no kondena arguidu pena unika tinan 22 prizaun.

11. Krime ofensa ba integridade fizika simples ho natureza violénsia doméstika

Nú. Prosesu	: 0009/17.PDBAU
Komposizasun Tribunál	: Singulár
Juis	: Dra. Ercilia de Jesus
Prokurador	: Dr. Domingos Goveia Barreto
Defeza	: Dr. Antonio Fernandes
Tipu pena	: Pena multa

Iha 19 Dezembru 2017, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MS hasoru nia feen nain rua DdS no HS, iha Distritu Viqueque.

Akuzasaun Prokurador

Prokurador akuza katak iha 5 Fevereiru 2017, iha tuku 17.00 lokraik, arguidu tuku dala 1 iha lezada DdS nia liman parte karuk no rezulta lezada monu ba rai. Arguidu kontinua basa dala 1 iha lezada nia hasan loos no karuk no arguidu nia liman kona mos iha lezada nia inus no rezulta kanek no ran. Arguidu kaer lezada nia liman kabun parte loos kaet iha bebak uma nian no rezulta kanek no ran sai.

Aleinde ne'e, arguidu lori sinelus sokas baku dala 2 iha lezada HS nia kabaas parte loos. Iha 6 Fevereiru 2017, arguidu ameasa lezada dehan "*hau mai fali ó tenke mate*". Lezada senti tauk ba hato'o keixa iha Polísia Eskuadra Viqueque Vila no kontinua hela iha uma mahon.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu deklara katak iha akontesementu ne'e arguidu fila hosi servisu hare lezada sira halimar hela bingo no arguidu foti sinelus sokas baku dala 2 iha lezada HS nia kotuk laran no dala 2 iha lezada DdS nia kotuk laran. Arguidu rejete katak nia amaisa lezada HS. Iha parte seluk lezada sira kontinua mantein faktus sira iha akuzasaun.

Alegasaun final

Prokuradór haktuir katak mantein faktus sira iha akuzasaun, mezmu arguidu nega faktus balun, maibé lezada sira kontinua konfirma faktu sira iha akuzasaun. Tanba ne'e husu ba Tribunál atu kondena arguidu ho pena prizaun fulan 6 suspende ba tinan 1.

Enkuantu Defeza haktuir katak arguidu deklara de'it faktus ne'ebé nia komete, tanba ne'e husu ba Tribunál aplika pena ne'ebé adekuadu ba arguidu.

Desizaun

Bazeia ba faktus ne'ebé prodús durante julgamentu, Tribunál konklui prosesu ne'e no kondena arguidu ba krime ne'ebé komete hasoru lezada HS ho pena prizaun tinan 1 suspende ba tinan 4.

Enkuantu ba krime ne'ebé komete hasoru lezada DdS kondena ho pena multa US\$240.00 no sei selu US\$2.00 kada loron durante loron 120 no selu kustu judisiál US\$30.00. Tribunál mós fiksa pena alternativa durante loron 80 prizaun, wainhira arguidu la kumpri pena multa ne'e.

12. Krime ofensa integridade fizika simples ho natureza violénsia doméstika

Nu. Prosesu	: 0042/17.PDBAU
Komposizasion Tribunál	: Singulár
Juis	: Dra. Ercilia de Jesus
Prokuradór	: Dr. Domingos G. Barreto
Defeza	: Dr. Jose M. Guterres
Tipu pena	: Pena prizaun tinan 2 suspende ba tinan 3

Iha 11 Dezembru 2017, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida PdA hasoru nia laen, iha Distritu Baucau.

Akuzasaun Prokuradór

Prokuradór akuza katak iha 18 Maiu 2017, iha tuku 09.00 dadeer, arguida tuku dala 3 iha lezadu nia kotuk laran no rezulta lezadu monu ba rai. Bainhira lezadu monu ba rai, arguida rasta lezadu hodi dudu ba odamatan portaun no taka kedas odamatan portaun nian. Agora dadaun lezadu ho aguida moris separadu.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penal too tinan 3 ka multa no konjuga ho artigu 2, 3 no 35 LKVD.

Produsaun ba prova

Iha julgamentu arguida nega faktus hotu iha akuzasaun. Arguida mós deklarata katak iha akontesementu ne'e arguida ho lezadu deskute malu de'it. Iha parte seluk lezadu kontinua reforsa faktus sira iha akuzasaun.

Alegasaun finál

Prokuradór haktuir katak mezmu arguida nega faktus hotu iha akuzasaun, maibé lezadu kontinua konfirma faktu sira iha akuzasaun. Tanba ne'e husu ba Tribunal kondena arguida tuir krime ne'ebé arguida komete.

Enkuantu Defeza husu ba Tribunál atu absolve arguida hosi prosesu ne'e, tanba arguida deklarata katak iha akontesementu ne'e arguida ho lezadu deskute malu de'it.

Desizaun

Depoizde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguida ho pena prizau tinan 2 suspende ba tinan 3 no selu kustu judisiál US\$ 10.00.

13. Krime ofensa ba integridade fízika simples

Nú. Prosesu	: 0299/12.PDBAU
Komposizasun Tribunál	: Singulár
Juis	: Dr. Hugo da Cruz Pui
Prokuradór	: Dra. Ivonia M. Gutterres
Defeza	: Dr. Sidonio M. Guterres
Tipu pena	: Omologa dezisténsia ba keixa

Iha 15 Dezembru 2017, Tribunál Distritál Baucau prezide prosesu tentativa konsiliaun ba krime ofensa ba integridade fízika simples ne'ebé envolve arguidu DC hasoru lezadu LAXG, iha Sub- distritu Laga, Distritu Baucau.

Akuzasaun Prokuradór

Prokuradór akuza katak iha 18 Juñu 2012, iha tuku 16.00 lokraik, sein motivu ne'ebé klaru arguidu kaer (aperta) lezadu nia faru gola no tebe dala 2 iha lezadu nia knosen parte karuk no loos no riba lezadu ba rai. Kazu ne'e akontese wainhira lezadu ho maluk sira hemu tua no arguidu mós hemu hela tua iha fatin seluk ne'ebé besik lezadu sira hemu ba, no derepente arguidu komete aktu ne'e hasoru lezadu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliaun antes tama ba julgamentu produsaun ba provas, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu deskulpa ba lezadu, deklara katak arepende ona nia hahalok no promete iha futuru sei la komete tan krime hanesan. Lezadu aseita ho pedidu ne'e no husu ba Tribunál atu dezisté ninia-keixa hasoru arguidu.

Alegasaun final

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu ne'e.

14. Krime abuzu seksuál ba menór

Nú. Prosesu	: 0001/16. MNSBD
Kompozisaun Tribunál	: Kolektivu
Juis	: Dr. Jose Escurial Dr. Hugo da Cruz Pui Dr. Jose Quintão
Prokuradór	: Dr. Luis H. Rangel da Cruz
Defeza	: Dr. Grigorio de Lima
Tipu pena	: Pena prizaun tinan 8

Iha 6 Dezembru 2017, Tribunál Distrital Baucau prezide julgamentu leitura akordaun ba krime abuzu seksuál ba menór ne'ebé envolve arguidu TSV hasoru lezada DARSX ne'ebé ho idade tinan 6, iha Distritu Manatuto.

Akuzasaun Prokuradór

Prokuradór akuza katak iha 17 Feveireiru 2016, iha tuku 07.00 dadeer, lezada tuir nia inan ba to'os laran. Arguidu hare no bolu lezada no lezada ba tuir arguidu. Hafoin ida-ne'e arguidu ko'us lezada ba kareta a'at nia kotuk hatun lezada ba rai. Arguidu kolu lezada nia kalsa no obriga atu halo relasaun seksuál ho lezada tanba ne'e lezada hakilar, ho nune'e arguidu fó hela osan 0.25 (quarter) no batar fulin 3 ba lezada no arguidu halai husik hela lezada.

Prokuradór akuza arguidu kontra artigu 177 alinea (1) Kódigu Penál kona-ba krime abuzu seksuál ba menór ne'ebé sei hetan pena prizaun tinan 5 too tinan 20.

Artigu 177 (1) KP defini katak; sé maka prátika koitu vajinál, koitu anál ka koitu orál ho labarik ne'ebé seidak iha tinan 14 sei hetan pena prizaun tinan 5 too tinan 20.

Produsaun ba prova

Iha julgamentu, arguidu konfesa faktus hotu iha akuzasaun. Arguidu mós deklara katak arrepende ona nia hahalok no foin primeira-vez mai hatan iha Tribunál. Iha parte seluk lezada kontinua konfirma no reforsa faktus hotu iha akuzasaun.

Testemuña DSX nu'udar lezada nia inan depoimenta katak iha akontesementu ne'e lezada halai ba ho tanis ba fó hatene testemuña katak arguidu bolu lezada, ko'us lezada ba kareta kotuk hafoin halo abuzu seksuál ba lezada.

Alegasaun final

Prokuradór konsidera arguidu provadu komete krime hasoru lezada, tuir konfisaun arguidu nian. Tanba ne'e husu ba Tribunál halo kualifikasaun juridika ba agravasaun hosi artigu 182 (1) KP no husu ba Tribunál aplika pena prizaun tinan 20 ba arguidu.

Enkuantu Defeza haktuir katak arguidu konfesa faktus hotu iha akuzasaun no arrepende ona nia hahalok. Tanba ne'e husu ba Tribunál aplika pena ne'ebé adekuadu ba arguidu.

Desizaun

Depoizde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun tinan 8.

15. Krime ofensa integridade física simples ho natureza violéncia doméstika

Nú. Prosesu	: 0018/17.BCSIC
Komposizasun Tribunál	: Singulár
Juis	: Dr. José Quintão
Prokuradór	: Dra. Ivonia M.Guterres
Defeza	: Dr. Sidonio M.Guterres
Tipu pena	: Pena multa

Iha 19 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violéncia doméstika ne'ebé envolve arguidu SdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 16 Abril 2017, iha tuku 22.00 kalan, arguidu tebe dala 1 iha lezada nia kotuk laran no lori au-maran atu baku lezada, maibé lezada halai ses tiha.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal too tinan 3 ka multa no konjuga ho artigu 2, 3 no 35 LKVD.

Produsaun ba prova

Iha julgamentu arguidu konfesa faktus hotu iha akuzasaun. Arguidu mós deklara katak arrepende ona ninia hahalok, liu tiha loran 3 sira di'ak malu kedas no foin primeira-ves mai hatan iha Tribunál. Iha parte seluk lezada kontinua konfirma faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada tuir konfisaun arguidu nian, tanba ne'e husu ba Tribunál aplika pena prizaun fulan 6 suspende ba tinan 2.

Iha parte seluk, Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál fó pena ne'ebé kmaan ba arguidu.

Desizaun

Depoide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena multa US\$15.00 no sei selu 0.50 sentavus kada loraun durante loraun 30. Tribunal mós fiksa pena alternativa durante loraun 20 prizaun, wainhira arguidu la kumpri pena multa ne'e.

16. Krime ofensa ba integridade física simples

Nú. Prosesu	: 0050/16. BCBCV
Kompozisaun Tribunál	: Singulár
Juis	: Dr. Jose Quintao
Prokuradór	: Dr. Luis H. Rangel da Cruz
Defeza	: Dr. Sidonio M. Guterres
Tipu pena	: Pena multa

Iha 20 Dezembru 2017, Tribunál Distritál Baucau prezide julgamentu leitura sentensa ba krime ofensa ba integridade física simples ne'ebé envolve arguidu DJdS hasoru lezada JMC, iha Sub-distritu Baucau, Distritu Baucau.

Akuzasaun Prokuradór

Prokuradór akuza katak iha 30 Agostu 2017, iha tuku 22.00 kalan, lezada ho nia inan hein hela lezada nia laen ho kareta ne'ebé atu tula lezada ho nia inan. Arguidu mosu mai hodi dehan "*ita ko'alia lia lai*". Nune'e, Lezada ho nia inan hatan lia saida maibé derepente arguidu basa keda dala 1 iha lezada nia hasan parte karuk.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa.

Produsaun ba prova

Iha julgamentu arguidu konfesa faktus hotu iha akuzasaun maibé deklarara katak lezada mak trata uluk arguidu iha rate laran. Iha parte seluk lezada kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba deklarasaun arguidu nian no konfirmasaun husi lezada. Tanba ne'e husu ba Tribunál atu kondena arguidu ho pena multa.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no promete iha futuru sei la komete tan krime hasoru lezada. Tanba ne'e husu ba Tribunál aplika pena ne'ebé kmaan ba arguidu.

Desizaun

Depoide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena multa US\$7.50 no sei selu 0.50 sentavus kada loron durante loron 15. Tribunál mós fiksa pena alternativa durante loron 10 Prizaun, wainhira arguidu la kumpri pena multa ne'e.

17. Krime omisídiu negligente

Nú. Prosesu	: 0106/16.BCSTR
Komposizasun Tribunál	: Singulár
Juis	: Dr. Jose Quintão
Prokuradór	: Dr. Luis H. Rangel da Cruz
Defeza	: Dr. Sidonio M. Guterres
Tipu pena	: Pena multa

Iha 21 Dezembru 2017 Tribunál Distritál Baucau prezide julgamentu leitura sentensa ba krime omisídiu negligente ne'ebé envolve arguidu AGP hasoru lezadu HG, iha Suku Osso Huna, Subdistritu Baguia, Distritu Baucau.

Akuzasaun Prokuradór

Prokuradór akuza katak iha 10 Agostu 2016, arguidu lori kareta trek husi Dili atu ba Baguia no tula mós ho pasajeirus nain 4. Baihira to'ó iha Laga, tanba kalan ona arguidu ho pasajeirus sira sei deskansa iha Laga.

Tuir mai iha 11 Agostu 2016, arguidu lori kareta ba Baguia to'o iha area Osso Huna hatun tiha sasan konstrusaun nian. Bainhira fila husi Osso Huno, no to'o iha kurva nian, derepenti kareta baku fila ba rai naruk no rezulta lezadu hakotu iis iha fatin akontesementu.

Prokurador akuza arguidu kontra artigu 140 alinea (1) KP kona-ba omisídiu negligente ho moldura penal tinan 1 too tinan 4 ka multa.

Produsaun ba prova

Iha julgamentu, arguidu konfesa faktus hotu iha akuzasaun no deklara katak lezadu nu'udar arguidu nia alin rasik. Bainhira sira fila husi Osso Huna to'o iha kurva nian, arguidu sente oin nakukun no lahatene tuir an derepente kareta baku fila no rezulta arguidu nia alin rasik mak mate, maibé maluk sira seluk la iha buat ida.

Alegasaun finál

Prokuradór konsidera arguidu provadu komete krime omisídiu negligente, tanba ne'e husu ba Tribunál aplika pena prizaun fulan 1 no suspende ba tinan 2.

Enkuantu Defeza husu ba Tribunál atu kondena arguidu ho pena ne'ebé adekuaudu, tanba arguidu konfesa faktus hotu iha akuzasaun no arguidu halo dispensa ba nia alin nia mate.

Desizaun

Depoide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena multa US\$75.00 no sei selu 0.50 sentavus kada loron durante loron 150 no selu kustu judisiál US\$20.00. Tribunál mós fiksa pena alternativa durante loron 100 prizaun, wainhira arguidu la kumpri pena multa ne'e.

18. Krime ofensa integridade fízika simples ho natureza violénsia doméstika

Nú. Prosesu : 0035/14.PDBAU
Komposizasun Tribunál : Singulár
Juis : Dr. José Gonsalves
Prokuradór : Dr. Luis H. Rangel da Cruz
Defeza : Dr. Antonio Fernandes
Tipu pena : Pena multa

Iha 21 Dezembru 2017 Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ASC hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 19 Setembru 2014, iha tuku 10.00 dadeer, arguidu lori fatuk tuda lezada, maibé la kona no arguidu kontinua foti ai-suak baku dala 1 iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura pena to'o tinan 3 ka multa no konjuga ho artigu 2, 3 no 35 LKVD.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklara katak arrepende ona ninia hahalok no foin primeira-ves mai hatan iha Tribunál no di'ak malu ona ho lezada.

Alegasaun finál

Prokuradór konsidera arguidu provadu komete krime hasoru lezada, tanba ne'e atu halo prevensaun iha futuro, husu ba Tribunál atu kondena arguidu ho pena prizaun fulan 6 suspende ba tinan 1.

Enkuantu Defeza husu ba Tribunál atu aplika pena ne'ebé adekuaudu ba arguidu, tanba arguidu konfesa, arrepende ona nia hahalok no foin primeira-vez mai hatan iha Tribunál.

Desizaun

Tribunál prova katak arguidu komete duni krime tuir faktus sira iha akuzasaun no kondena arguidu ho pena multa US\$180.00 ne'ebé sei selu US\$2.00 kada loron durante loron 90 no kustu judisiál US\$20.00. Tribunál mós fiksa pena alternativa durante loron 60 prizaun wainhira arguidu la kumpri pena multa ne'e.

19. Krime ofensa ba integridade física simples ho natureza violência doméstica

Nú.Prosesu : 0035/17.PDBAU
Komposiezasun Tribunal : Singulár
Juis : Dr. Hugo da Cruz Pui
Prokuradór : Dra. Ivonia M. Guterres
Defeza : Dr. Sidonio M. Guterres
Tipu pena : Pena multa

Iha 28 Dezembru 2017, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu TMdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 16 Agostu 2017, iha tuku 22.00 kalan, arguidu basa dala 3 iha lezada nia hasan sorin loos no karuk no tuku dala 1 iha lezada nia matan fukun. Depoisde akontesementu ne'e, lezada ba hato'o kedas keixa iha polísia no kontinua halo tratamentu iha Centru Saúde Venilale no hela iha uma mahon durante semana tolu.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu konfesa faktus hotu iha akuzasaun, no deklara katak foin primeira-vez mai hatan iha Tribunál, arrepende ona nia hahalok no di'ak malu ona ho lezada. Iha parte seluk lezada kontinua reforsa faktus sira iha akuzasaun.

Testemuña BSES nu'udar lezada nia subriña depoimenta katak iha akontesementu ne'e testemuña iha hela kuartu laran no deperente rona lezada hakilar.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no depoimentu husi lezada rasik. Tanba ne'e husu ba Tribunál aplika pena multa ba arguidu.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál, di'ak malu ona ho lezada. Tanba ne'e husu ba Tribunál aplika pena ne'ebé kmaan ba arguidu.

Desizaun

Tribunál prova katak arguidu komete duni krime tuir faktus ne'ebé deskreve iha akuzasaun Prokuradór nian. Tribunál kondena arguidu ho pena multa US\$90.00 no sei selu US\$1.00 kada loran durante loran 90 no selu mós kustu judisiál US\$30.00. Tribunal mós fiksa pena alternativa durante loran 60 prizaun, wainhira arguidu la kumpri pena multa ne'e.

20. Krime ofensa ba integridade física simples ho natureza violência doméstica

Nú. Prosesu : 0023/17.VQSIC
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Antonio Fernandes
Tipu pena : Pena prizaun fulan 3 suspende ba tinan 1.

Iha 19 Dezembru 2017, Tribunál Distritál Baucau liuhosi Tribunál Movél iha Distritu Viqueque, prezide julgamentu leitura sentensa ba krime ofensa ba integridade fízika simples ne'ebé envolve arguidu AdC hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 20 Juñu 2017, iha tuku 20:00 kalan, arguidu silu lezada nia liman karuk no arguidu lori liman sikun aperta lezada nia kakorok. Arguidu mós lori liman taka lezada niniaibun. Iha akontesementu ne'e lezada isin rua fulan 2.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun, no deklara katak foin primeira-vez mai hatan iha Tribunál, di'ak malu ona ho lezada no arrepende ona nia hahalok. Arguidu mós promete sei la baku tan lezada iha futuru. Iha parte seluk lezada kontinua reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba arguidu ninia konfisaun rasik. Atu halo prevensaun iha futuru arguidu la komete tan krime hanesan, husu ba Tribunál aplika pena prizaun fulan 6 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no ho inisiativa rasik di'ak malu ona ho lezada. Tanba ne'e husu ba Tribunál aplika pena ne'ebé adekuadu ba arguidu.

Desizaun

Tribunál konsidera katak arguidu provadu komete krime tuir faktus husi akuzasaun. Bazeia ba provas hirak-ne'e, Tribunál Konklui prosesu ne'e no kondena arguidu ho pena prizaun fulan 3 suspende ba tinan 1.

21. Krime ofensa ba integridade fízika simples

Nú. Prosesu : 0488/11.PDBAU
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto

Defeza : Dr. Antonio Fernandes
Tipu pena : Omologa pedidu dezisténsia keixa

Iha 19 Dezembru 2017, Tribunál Distritál Baucau liuhosi Tribunál Movel iha Distritu Viqueque prezide julgamentu tentativa konsiliaun ba krime ofensa ba integridade fizika simples ne'ebé envolve arguidu EG hasoru lezadu AG, FS no JA, iha Distritu Viqueque.

Akuzasaun Prokuradór

Prokuradór akuza katak iha 13 Outubru 2016, iha tuku 21:00 kalan, arguidu EG tuku lezadu AG nia matan sorin karuk no atu tuku tan mak lezadu FS tahan netik. Wainhira lezadu AG no lezadu FS fila ba uma, arguidu lori fatuk duni tuir no tuda lezadu FS nia ulun no rezulta kanek no ran to'o dezmaia. Lezadu JA ne'ebé hela besik fatin akontesementu rona ema hakilar no barullu, nune'e lezadu ba hare no buka tuir arguidu atu entrega ba polísia. Tanba ne'e arguidu lori rama ambon hana kona iha lezadu JA ninia hirus matan. Kazu ne'e akontese wainhira lezadu sira fila hosi sede suku, lezadu FS lao no soke malu ho arguidu tanba ne'e arguidu hirus no komete aktu hirak ne'e hasoru lezadu sira.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e, antes tama ba julgamentu prodúsaun ba prova, juis husu atu halo tentativa konsiliaun ba arguidu no lezadu sira.

Iha prosesu konsiliaun ne'e, arguidu husu deskulpa ba lezadu sira no promete katak sei la komete tan hahalok hanesan hasoru lezadu sira no ema seluk iha futuru. Arguidu mós deklarara katak arrepende ona nia hahalok. Lezadu sira konkorda ho pedidu ne'e no husu ba Tribunál atu dezisté sira ninia-keixa hasoru arguidu.

Alegasaun finál

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu dame hosi parte rua no pedidu dezisténsia hosi lezadu sira, Tribunál konklui prosesu ne'e omologa akordu dame entre parte sira.

22. Krime ofensa ba integridade fizika simples ho natureza violénsia doméstika

Nú. Prosesu : 0011/16.VQUCB
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Antonio Fernandes
Tipu pena : Pena prizaun fulan 3 suspende ba tinan 1

Iha 20 Dezembru 2017 Tribunál Distritál Baucau liuhosi Tribunál Movél iha Distritu Viqueque, prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida TdJ hasoru nia oan mane, iha Distritu Viqueque.

Akuzasaun Prokuradór

Prokuradór akuza katak, iha 10 Outubru 2016, iha tuku 18:30 lokraik, arguida lori besi kanu baku dala 3 iha lezadu nia ulun no rezulta lezadu nia ulun kanek no ran sai barak.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguida konfesa faktus hotu iha akuzasaun no deklarasaun katak nia baku lezadu tanba de'it lezadu la ba kesi lutu kintal no halo bibi han hotu aihan iha kintal laran. Arguida nu'udar feto faluk no desde arguida nia laen mate arguida mak sustenta ninia oan nain 4. Arguida mós deklarasaun katak foin primeira-vez mai hatan iha Tribunál, di'ak malu ona ho lezadu no arrepende ona nia hahalok. Arguida promete sei la baku tan lezadu iha futuro. Iha parte seluk lezadu kontinua konfirma no reforsa faktus sira iha akuzasaun.

Alegasaun final

Prokuradór konsidera arguida provadu komete krime hasoru lezadu. Atu halo prevensaun ba arguida hodi la komete tan krime hanesan iha futuro, husu ba Tribunál aplika pena prizaun fulan 6 suspende ba tinan 1.

Enkuantu Defeza haktuir katak arguida konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekuadu ba arguida.

Desizaun

Tribunál konsidera katak arguida provadu komete krime tuir faktus husi akuzasaun. Bazeia ba faktus provadus hirak-ne'e, Tribunál konklui prosesu ne'e no kondena arguida ho pena prizaun fulan 3 suspende ba tinan 1.

23. Krime ameasa

Nú. Prosesu	: 0059/16.PDBU
Kompozisaun Tribunál	: Singulár
Juis	: Dr. Jose Escorial
Prokuradór	: Dr. Domingos Goveia Barreto
Defeza	: Dr. Antonio Fernandes
Tipu pena	: Omologa pedidu dezisténsia keixa

Iha 19 Dezembru 2017, Tribunál Distritál Baucau liuhosi Tribunál Movél iha Distritu Viqueque prezide julgamentu tentativa konsiliaun ba krime ameasa ne'ebé envolve arguidu SA hasoru lezadu AF, iha Distritu Viqueque.

Akuzasaun Prokuradór

Prokuradór akuza katak, iha 13 Juñu 2016, iha tuku 9.30 dadeer, lezadu ho ninia oan RF ba hasai foto ba ai horis iha sira nia to'os laran hanesan nuu no ai teka sira. Iha momentu ne'eba arguidu SA iha hela to'os laran no kaer hela katana no ameara lezadu dehan "*ó mai halo saida iha ne'e , di'ak liu mak ó fila ona se lae hau oho tia ó!*" Tanba ne'e halo lezadu sente tauk no fila kedas ba uma.

Prokuradór akuza arguidu kontra artigu 157 Kódigu Penál kona-ba krime ameara ho moldura penál too tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e, antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu deskulpa ba lezadu no promete iha futuru sei la komete tan krime hasoru lezadu no ema seluk. Arguidu mós deklara katak arrepende ona nia hahalok. Lezadu konkorda ho pedidu ne'e no husu ba Tribunál atu dezisté ninia-keixa hasoru arguidu.

Alegasaun finál

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténcia keixa hosi lezadu, Tribunál konklui prosesu ne'e omologa akordu dame entre parte sira.

24. Krime ofensa ba integridade fízika simples

Nú. Prosesu	: 0085/16.PDBAU
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Domingos Goveia Barreto
Defeza	: Dr. Antonio Fernandes
Tipu pena	: Omologa pedidu dezisténcia keixa

Iha 19 Dezembru 2017, Tribunál Distritál Baucau liuhosi Tribunál Movél iha Distritu Viqueque prezide julgamentu tentativa konsiliaun ba krime ofensa ba integridade fízika simples ne'ebé envolve arguidu IFV hasoru lezadu nia oan (ALF) no arguidu ninia banin fetu AdS, iha Distritu Viqueque.

Akuzasaun Prokuradór

Prokuradór akuza katak iha 1 Novembru 2016, iha tuku 15:00 lokraik, arguidu lori bebak ho naruk metru 1 hodi baku dala 1 iha lezadu ALF ninia kotuk laran, tebe dala 1 iha lezadu nia kidan no rezulta lezadu monu ba rai. Hafoin hetan ofensa ne'e lezadu halai ba subar iha arguidu

ninia banin feto (AdS) nia kotuk maibé arguidu tuir ba no lori liman sikun fai iha ninia banin feto ninia kabun no rezulta lezada monu ba rai. Arguidu tebe tan dala 3 iha lezada nia kotuk laran no kidan sorin loos. Kazu ne'e akontese bainhira nia oan (ALF) ba sosa sasan iha kios no arguidu dehan ba lezadu fila ba hela iha uma ona no la bele ba hela tan AdS ne'ebé nu'udar lezadu ninia avo feto no arguidu ninia banin feto. Maibé lezadu lakohi, nune'e arguidu komete aktu hirak ne'e hasoru lezadu no lezada.

Prokuradór akuza arguidu sira kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e, antes tama ba julgamentu prodúsaun ba prova, juis husu atu halo tentativa konsiliaun ba arguidu, lezadu no lezada.

Iha prosesu konsiliaun ne'e, arguidu husu deskulpa ba lezada hanesan inan banin ho lezadu hanesan oan. Arguidu promete katak iha futuru sei la komete tan hahalok hanesan hasoru lezadu ho lezada no ema seluk. Arguidu mós deklara katak arrepende ona nia hahalok ne'ebé nia halo ona hasoru ninia oan no ninia banin feto. Lezadu ho lezada konkorda ho pedidu ne'e no husu ba Tribunál atu dezisté sira ninia-keixa hasoru arguidu.

Alegasaun final

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia keixa hosi lezada no lezadu, Tribunál konklui prosesu ne'e no omologa akordu dame entre parte sira.

25. Krime ofensa ba integridade fizika simples ho natureza violénsia doméstika

Nú. Prosesu	: 0011/17.VQSIC
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Domingos Goveia Barreto
Defeza	: Dr. Antonio Fernandes
Tipu pena	: Pena prizaun fulan 3 suspende ba tinan 1

Iha 19 Dezembru 2017 Tribunál Distritál Baucau liuhosi Tribunál Movel iha Distritu Viqueque prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AS hasoru nia feen, iha Distritu Viqueque.

Akuzasaun Prokuradór

Prokuradór akuza katak, iha 23 Feveireiru 2017, iha tuku 14:00 lokraik, arguidu foti fatuk tuda lezada nia ulun no rezulta lezada nia ulun kanek no ran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun no deklara katak tuda fatuk ba paredi mak haksoit kona fali iha lezada ninia ulun. Arguidu foin primeira-vez mai hatan iha Tribunál, diak malu ona ho lezada no arrepende ona nia hahalok. Arguidu promete katak iha futuru sei la baku tan lezada. Iha parte seluk lezada kontinua konfirma no reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezadu bazeia ba konfisaun arguidu nian. Tanba ne'e atu halo prevensaun iha futuru arguidu la komete tan krime hanesan, husu ba Tribunál aplika pena prizaun fulan 6 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekuadu ba arguidu.

Desizaun

Tribunál konsidera katak arguidu provadu komete krime tuir faktus husi akuzasaun no Tribunál kondena arguidu ho pena prizaun fulan 3 suspende ba tinan 1.

26. Krime ofensa ba integridade fizika simples ho natureza violénsia doméstika

Nú. Prosesu	: 0009/17.VQOSU
Kompozisaun Tribunál	: Singulár
Juis	: Dr. Jose Escurial
Prokurador	: Dr. Domingos Goveia Barreto
Defeza	: Dr. Antonio Fernandes
Tipu pena	: Pena prizaun tinan 3 suspende ba tinan 3

Iha 19 Dezembru 2017 Tribunál Distritál Baucau liuhosi Tribunál Movel iha Distritu Viqueque prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CdS hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 11 Maiu 2017, iha tuku 13:00 lokraik, arguidu tuku dala 2 iha lezada nia hasan sorin karuk no loos no rezulta lezada monu ba rai. Depois monu tun tiha ba rai arguidu kontinua tuku tan dala 1 iha lezada nia kanuruk.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun no deklara katak antes ne'e arguidu hetan ona kastigu pena multa ba krime hanesan. Arguidu mós deklara katak arrepende ona nia hahalok no promete iha futuru sei la baku tan lezada. Iha parte seluk lezada kontinua reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru lezada dala barak ona, arguidu iha ona atesidente kriminál no iha kazu primeiru arguidu hetan ona pena multa. Tanba ne'e husu ba Tribunál atu kondena arguidu ho pena prizaun tinan 3 suspende ba tinan 3.

Enkuantu Defeza haktuir katak arguida konfesa faktus hotu iha akuzasaun, arrepende ona nia hahalok, diak malu ona ho lezada, arguidu mak sustenta ninia oan nain 7, oan nain 3 husi feen kiik no oan nain 4 husi feen boot. Tanba ne'e husu ba Tribunál aplika pena ne'ebé adekuadu ba arguidu.

Desizaun

Tribunál konsidera katak arguidu provadu komete krime tuir faktus husi akuzasaun, arguidu mós hetan ona kondenasau husi Tribunál ba krime primeiru ho pena multa. Atu halo prevensaun iha futuru arguidu la komete tan krime hanesan, Tribunál konklui prosesu ne'e no kondena arguidu ho pena prizaun tinan 3 suspende ba tinan 3.

27. Krime ofensa ba integridade fizika simples ho natureza violénsia doméstika

Nú. Prosesu	: 0022.17.VQOSSU
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Domingos Goveia Barreto
Defeza	: Dr. Antonio Fernandes
Tipu pena	: Pena prizaun fulan 3 suspende ba tinan 1

Iha 18 Dezembru 2017, Tribunál Distritál Baucau liuhosi Tribunál Movél iha Distritu Viqueque prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MTdS hasoru nia feen, iha Distritu Viqueque.

Akuzasaun Prokuradór

Prokuradór akuza katak, iha 14 Janeiru 2017, iha tuku 15:24 lokraik, arguidu tuku dala 2 iha lezada niaibun, tuku dala 2 iha lezada nia matan fukun sorin karuk no foti fatuk ki'ik ida tuda dala 1 iha lezada nia ulun no rezulta kanek no ran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penál too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun no deklara katak foin primeira-vez mai hatan iha Tribunál, diak malu ona ho lezada, arrepende ona nia hahalok no promete iha futuru sei la baku tan lezada. Iha parte seluk lezada kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada tuir faktu sira iha akuzasaun no bazeia ba konfisaun arguidu nian. Atu halo prevensaun iha futuru atu arguidu la komete tan krime hanesan, husu ba Tribunál aplika pena prizaun fulan 6 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekuadu ba arguidu.

Desizaun

Tribunál konsidera katak arguida provadu komete krime tuir faktus husi akuzasaun. Bazeia ba provas hirak-ne'e, Tribunál konklui prosesu ne'e no kondena arguidu ho pena prizaun fulan 3 suspende ba tinan 1.

Atu hetan informasaun kompleitu bele kontaktu ba:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
info@jsmp.tl